

Jemisi Krenea Avontafemofu Naneke

Jemisi kre'nea naneke

1 ¹ Jemisi'na Anumzamofone Ranti Jisas Kraisi kazokzo eri'za ne'mo'na, 12fu'a naga'nofi'ma mopa atretma kokankokama umani emani hu'naza nagamotarega, ama avona kreneramue.

Amentintifi oti hanaveti'neni knaza erizamofu naneke

² Nenfugta knazampima ufresutma, muse zane hutma tamagesa antahiho. ³ Na'ankure tamagra antahi'naze, tamentintima reramaheno ke'zamo'a, knazampima oti hankavetineno, knazama kazigazi huno erino vu'za erifore nehie. ⁴ Hagi maka kna tamagra oti hanavetita, knazana erita nevinkeno, ana tamavutmavazamo'a hanavetino nevina, Anumzamofu avu'avama huzampina, atupara osnageno, fatgo huno knare hugahie.

⁵ Hianagi iza'o knare antahintahigu'ma atupama hanuno'a, Anumzamofu antahigenkeno amino, maka vahe'mo'za nunamu hu'za Agri'ma antahigazamokizmia, rimpa heozmante amne nezmiankino, amne tamigahie. ⁶ Hu'neanagi antahigesimo'a, amentinti nehuno tare agu'agesaretira antahionkeno, na'ankure tare agu'agesareti'ma antahigemofona, zaho erino hage rimomofu eri kranto kranto hiankna nehie. ⁷ E'inahu vahe'mo'a Ramofontegati mago'zana erigahue huno agesa ontahino, ⁸ agra tare antahintahine vahe mni'neankino, mika zama hifina magoke kante anteno nosie.

⁹ Mago'mo amunte omne'nenigeno, Anumzamofu amage nentenimo'a muse hino, Anumzamofu avurera ra agi erine. ¹⁰ Hu'neanagi Anumzamofu feno ne'ma azeri anteramisigeno mani'nesimo'a musehino. Na'ankure feno vahe'mo'za trazamofu mosre'amo hianka hu'za ko fanane hugahaze. ¹¹ Na'ankure zgemo'a amuhu'ane marerino, ana trazana te hagage higeno, amosre'amo'a hagage huno evuramigeno, konariri'amo'a fnane nehie. Anahukna hu'za feno vahe'mo'za, ana fenozmine fanane hugahaze.

¹²Rehe'za ne-esigeno kazigazi huno agatereno vania vahe'mo'a asomu'ma erisiana, kini fetori eriankna huno manivava asimura erigahie. Anumzamo agri avesinentaza vahe ko huhampri zamante'nea, asimu erigahie. ¹³Mago zamo'ma avazu hanigeno rehezampima ufresuno'a, kefo avu'avazanteti Anumzamo'a renahenoke huno huonteno, na'ankure Agra mago vahera havi avu'avatetira rehenonkegahie. ¹⁴Hu'neanagi mago magomofona agri'a kefo avesi'zamo, avazu huno rehezampina avarenente. ¹⁵Hagi havi avu'avazahu avesi'zamo, a'nemo amu'ene hiankna higeno, kumi erifore higeno, kumi'mo hagerama nehuno'a, fri'za eri fore nehie.

¹⁶Navesineramantoa nafuhetma tamagra'a reramatga osiho. ¹⁷Mika knare huno fatgo hu'nea, musezana anagamuti eneramie, monafinkati masazamofo Nefantegati ne-e, avu'azama'amo zahe osuno turinamo hiankna huno zaza huteno, atupa huteno osugahie. ¹⁸Mika'zama troma hu'nea zamofonese ese rga'a manisunku, Agra'a avesite tamage kereti tazeri fore hu'ne.

Ke antahino avariri zamofonaneke

¹⁹Knare nafuheta, ama kea antahi so'e hiho, mika'motma ame hutma kea antahigahazanagi, akoheta kea nehinkeno tamarimpa oheno.

²⁰Na'ankure vahe'moforimpa he'zamo'a, Anumzamofonfatgo avu'avazana avreno omegahie. ²¹E'ina hu'negu mika agru osu avu'avazana erinetreta, tamagu'afima kefo avu'avazama me'nesiana erinetretma, anteramitma, tamagu tamema tamagama vazisia nanekema Anumzamo'ma tamagu'afima hankre'neana eriho.

²²Amnea AnumzamofonKe'agera ontahio, kagraka'a regavatga hugahananki, ana nanekemoma hania kante antenka amage anto.

²³Mago'mo'ma kema nentahino, ana kema amage'ontesiana, agra kapopi avugosa keteno, ²⁴atreno nevuno anama agra avugosa ke'neana, ame huno age'neknia kna nehie. ²⁵Hu'neanagi, inamo'ma kinafinti tazeri fru nehia, hentofa kasegefima avuma ke ankenereho, kazigazi huno avaririno antahi'nesia nanekage'okanino amage'antesimofona, mika'zama hanifina Anumzamo'a, asomu huntengahie.

²⁶Mago'moka mono vahe'mani'noe nehunka kagefu'na kegva osnanana, kagra'a regavatga hanankeno mono kamo'a amnezankna hugahie.

²⁷Agru huno fatgo monoku'ma Anumza Nafatimofona ave'nesiana, e'i megusa mofavre'zgane, kento a'ne zga knazampima mani'nesazana kegva hunezmanteta, atrenkeno ama mopafi kefozamo'a tamazeri pehena osino.

Magoke avamente vahe'ma tavesi zmantesanamofonaneke

2 ¹Nafuhete, hanavenentake msa'ane RantimofonJisasi Kraisimpi tamentinti nehaza vahe'motma, rezogitma mago vahekuke tamavesi onteho. ²Atru hu'nesafima mago feno ne'mo hentofa kukena

erinehankreno, korire asa eri'nentanino efresnigeno, mago amunte omame ne'mo pehenage kukena huno monoma nehanafima efresiana, ³hentofa kukena huno ea feno ne'mofo kesga huntenka anage nehane, ama knare trate emanio nehunka, amunte omame pehenage kukena huno ea ne'ku, amure otio huge ama nagafi mopare emanio nehane. ⁴Tamagra'a amu'nontamifina vahe zmazeri havizahu naneke nehutma, kefo antahizanteti vahera refako nehazafi? ⁵Antahiho, knare nafuheta, Anumzamo'a ama mopafi vahe zamavufi zamunte omame vaheku' zamentintifi feno vahere huno huhampri zamanteno, Anumzamofu kuma erisanti haregahaze huno Agri'ma avesinentaza vahe huvempa huozmante'nefi? ⁶Hu'neanagi zamunte omame nagara zmazeri haviza nehaze. Feno vahe'mo'za knaza neramami'za, tmavare'za naneke hu tratera nevazafi? ⁷Jisasi Kraisi knare agi'ane Ne'mofo nagama mni'nazana, zamagra zmazeri haviza osu'nazafi? Izo zmagra zmazeri haviza hu'naze.

⁸Fatgo hutma avontafepima me'nea kasegema amage'antesnutma, ***tvaontamire'ma nemanisaza vahe'mokizmia tamagraguma tamavesi nentesazaza hutma rumokizmia tamavesi zmantheho***, anama hanutma tamage avu'avaza hugahaze. ⁹Hu'neanagi rezogitma mago vahekuke tamavesi antesazana, kumi hanageno kasegemo'a tamazeri ama'hina, kasegea hantagi vahe manigahaze. ¹⁰Na'ankure, aza'o ana mika kasege amage'nenteno, anampinti Anumzamofoma magoke kasege'a ruhantagisiana, ana mika kasege ruhantagigahie. ¹¹Na'ankure ***rumofo vene, a'ene monko'zana osiho*** huno hu'nea Anumzamo ***vahera ahe ofriho*** huno hu'ne. E'ina hu'negu kagrama rumofo vene, a'ene monko'zana osugahananagi, vahe'ma ahe frisazana e'i kasege hantagi vahe manigahane hu'ne. ¹²Hagi keaga tamifine, tamavu'tamava hanafina, kinafinti tamavre atre'nea kasegemo refako hurantegahie hutma antahiho. ¹³Na'ankure vaheku'ma kasunku huozmante vahe'moka, Anumzamo'a asunkura huogantegosie. Hianagi kagrama vahe'mofoma kasumantagintesanana, Anumzamo'a kagri'enena asuragigante'na vahe'ma refko huknarera, keaga hugante kemofona agateregahane.

**Amentinti nehuno, knare avu'ava osaniana, ana
amentintimo amnezankna hu'zamofu nanake**

¹⁴Nafuhetma, mago ne'mo'ma namentinti nehue nehuno, ana amentintima avu'avapima erinteno osaniana nankna azahu'za erigahie? E'inahu amentintimo'a aguvazigahifi? I'o. ¹⁵Magoke magoke knazupa mago negafu'o, negasaroma kukenaguro, ne'zankuma atupa hu'nenigenka, ¹⁶knareki vuo nagesa antahuana Anumzamo'a knare hugantegahie nehunka, knare kukena nehunka ne'zana negamu huo hunka hunentenka, atupama hunesiazama azama osnanana, e'i kemo'a inankna huno aza

hugahie? ¹⁷Amentinti hu'zamo'enena e'inahu kna hu'ne, tamentinti nehune nehuta, avu'avapima erinteta osanunana, tamentintimo'a amne'zankna hugahie. ¹⁸Ana hu'neanagi mago'mo'a anage hugahie, mago'amokizmi zamentinti me'geno, mago'amokizmia knare erizama eri zamavuzamava me'ne. Nagra anage nehue, knare erizanka'a omnesigena, nagra kamentintia onkegosue. Hianagi nagra knare eri'za niareti kagrira, namentintini'a kaveri hugahue. ¹⁹Tamagra magoke Anumza mani'ne hutma tamentinti nehazana, e'i tamage, havi hankro'mo'zanena anahukna zamentinti nehu'za, kore nehu'za zamahirahi nerege'za mani'naze. ²⁰Kagra negi nagi vahere! Antahi ama'ma huzankura nontahino, eri'zama'a omane kamentintimo'a amnezankna hugahie. ²¹Nerageho Abrahamu, nemofu Aisakima kre sramanavu itare, Anumzamofoma ami'nea zankuma, fatgo nere huno hu'neana ontahinazafi? (Jen-Agf 22:1-14) ²²Antahi ama huo, Abrahamu'ma amentintima hiazamofona avu'avapi erinteno, ana avu'ava higeno amentintima hu'neazana erignare hu'ne. ²³Hagi avontafepi hu'nea kemo'a efore hu'ne, **Abrahamu'a Anumzamofonte amentinti higeno, Anumzamo'a fatgo nere hunte'ne**, ana hu'negu Anumzamofu rone'a mani'ne hu'za vahe'mo'za nehaze. (Jen-agf 15:6) ²⁴Ana hu'negu antahiho, tagra Anumzamofu avure'ma fatgo vahe'ma manisunana, tamentinti'retikerompaga, tamentintima nehuta tavutavapima erinteta hanunkeno, fatgo vahere huno hurantegahie. ²⁵Anahukna huno, Rehapu monko a'mo'a afure vahe'ma noma'afi zamavre frakiteno, ru kampinginti zamavre atrege'za vu'naza avu'avazama'amo, Anumzamofu avure fatgo ara mani'ne hu'ne. (Jos 2:1-21) ²⁶Tavufafima tasimu'ma omanesiana frigahune. Hanki anahu'kna huno tamentinti'age nehuta, tavutavapima eriontesunkeno'a, tamentintimo'a frino amne'zankna hugahie.

Tagefu'namofo kegva hanuna naneke

3 ¹Nenafugtane nasarahetanena rempi huzami vahera rama'amota manisune hutma ontahiho, na'ankure tamagra ko antahi'naze, maka rempima hunezamumota Anumzamo'a hanavetino keaga hurantegahie. ²Na'ankure rama'a zampi havizana nehune. Hagi iza'o agrama kema hanifima fatgo osu kegaga huzanku'ma kva'ma hanimo'a, agra soe ne'kino amne mika avufgamofona kvahu so'e nehie. ³Hanki osi ainia hosirimimofu zamagipi tamage'antesie huta nofi renteta, zamazeri rukre hanunkeno'a, amne hosimofu mika avufgamo'a tamage'anteno rukre hugahie. ⁴Hagi vente'mofone keho, tusi'aza me'neanagi ra zahomo retunefe. Hianagi osi zotareti, inantego ventema azeri ne'moma vunakuma hirega, azeri rukre higeno nevie.

⁵Anahukna huno agefuna osi avufgamo'agi, tusi'a veganokno ageru rugahie. Osi teve regregeno, ra avo'no traza afe teaza hugahie! ⁶Hagi

tagefunamo'a tevegna hu'ne. Tagefunafina kefo kemo avite'neankino, amne ana miko kavufamofona eri haviza hugahie. Amne ana miko kavufga teve kampina avrenente. Ana tevea teve kuma'mo taginte'ne. ⁷Na'ankure mika ruzahu ruzahu afi' zagakfama, namazgama, zmasaguregati regrarohe'za vano nehaza zgaramima, hagerimpi zgamofona vahe'mo'za azeri agazone neheze. ⁸Hianagi vahe'mo'a, agefunamofo kegva krino, azeri agazonea osugahie. Vahe'mofo azeri fri avuatgazamo avitegeno, kefo kemoke atirami vava hugahie. ⁹Tagnefunanu Rantimofone, Anumzanena ra znagia nezanamita, ana tagnefunanura Anumzamo agra'gna retro huzmente'nea vahe'mokizmi sifna kea hunezmantone. ¹⁰Ana agipintike asomu kene, sifna kenena atineramie. Nenfugta nasarehetanena e'inhau'zana omneno. ¹¹Amne magoke kampuipintira, tintfane, hagerinena ehanatigaha'o? ¹²Nenfugata nasarahetanena, fiki zafamo'a olivi rga amne rentegahifi, krepri zafamo'a, fiki raga rentegahio? I'o. Anahu kna huno hagerimpintira tintfana fore osugahie.

Knare antahintahizamofa naneke

¹³Aza amu'nontamifintira ama antahintahine mika zampima anihu vahera mani'ne? Ana knare antahintahi'a atrenkeno knare erizama'amoki, avufa anteramino mni avu'ava zamo, erinte ama hino. ¹⁴Hianagi vahe'mofoma antahimugi ante'zamo'ene kagraguke antahizamofa kagu'afi mevitenenigenka, kavufga mreri kavukvatetira tamage kemofa eri amnezanknara osuo. ¹⁵E'inhukna havi antahintahizana, monafintira nomeanki, ama mopafi kefo hankrotegati ne-e. ¹⁶Krimpa mugizane, kavufa antemareri'zama me'nesifina, miko'mako havi avu'ava'zane fatgo osu'zana me'nenigenka kegahane. ¹⁷Hu'neanagi monafinti erami'nea knare antahintahizana, ese'zana agru huno mani antahintahiza me'ne. Rimpa fruma huno mani'zane, miko kna akoheno mani'zane, rumofo ke antahimi'zane, asunku hu'zane knare'zane aviteno nemanie. Mago'mofonkuke hu'zana omaneno tamage avu'avake hu'zane. ¹⁸Rumokizmima zamarimpa fruma erinezamiza vahe'mo'za, zamarimpa fruzamofa avimaza nehankrazanki'za, nena'ama vasagesazana fatgo avu'avaza hamaregahaze.

Anumzamofonte urava'o hanuna naneke

4 ¹Na'amo amu'nontamifina kefra hu'zane, ha' hu'zana eri forenehie? Havi tamavesi'za tamagu'afi me'neni ha'nerea zampinti efore nehifi? ²Mago'a zanku tamave'nesigetma kenunu nehazanagi e'norize. E'ina nehutma vahera zmahe nefrizanagi anazana e'norize. Rumofo zankura ke hakare nehutma franevazitma hara nehazanagi, mago'zana e'nori'ze. Na'ankure Anumzamofona tamagra nunamuna hutma antahinonkaze.

³Tamagrama antahigaza zana e'norize, na'ankure knare osu antahintahireti antahigazagu e'norize. Anama tamisia zana eritma tamagrama tamavenesia zante atregahaze. ⁴Tamagra monko a'nemo hiankna hutma, ru anumzante mono hunentaza vahe'motma, ama mopafi avu'avazamofonte'ma tragoneteta ana avu'avama hanazana, Anumzamofona ha'rentegahazanki tamagra ontahi'nazo? E'ina hu'negu iza'o ama mopafi zante tragotesimo'a, Anumzamofa ha' vahe fore nehie. ⁵Avontafemo'a anage hu'neana, amne ke hu'nefi? Anumzamo'ma Avamu'ama tagu'afi antegeni mani'neana, Agri agorga manisiegu avenesie. E'ina'ma osigeno'a rimpagna nemie. ⁶Hu'neanagi agra razampi asuraginerante, e'ina agafare avontafe'mo'a anage hu'ne, **Anumzamo'a zamufga antemareriza vahe ha'renezmanteno, zamufga anteneramiza vahera asuraginezmante.** ⁷E'ina hu'negu Anumzamofa agorga anteramita nemanitma, Satana ha'renteta retufe atrenkeno tamatreno freno. ⁸Anumzante erava'o hinkeno, Agranena tamagaritera erava'o hino. Kumi vahe'motma tamazana sese nehutma, tare tagufa antahintahine vahera tamagu'a eri avusese hiho. ⁹Kumima nehaza zankura tamasunku nehutma, krafa hutma zaviteho. Kiza zokagoma nehazazana netretma, zavi krafa nehutma musema nehaza zana atretma tamasunku hiho. ¹⁰Anumzamofa avurera tamagra tamavufga anteraminkeno, Agra tamazeri sga hino.

Rumokizmi huhaviza osanuna naneke

¹¹Nafuhetma, huhaviza ohunte ahunte osiho. Iza'o nefuma huhaviza huntege refakoma huntesimo'a, agra kasegemofu huhaviza nehuno, refako nehie. Kasegema refako'ma hananana, kasegea amage nontananki, kasege refako hu vahe nemanine. ¹²Kasege neramino, refakoma hurante Nera Anumzana magoke mani'ne, Agrake tagu'vazige, tahe fanane huge hugahie. Hu'neanagi tamagra azagata neramafuna refako hunentaze?

Henkama esnia zamofa naneke

¹³Menina antahiho, anahukna kema nehazamotma, menino okino rankumapi vuta, mago kafufi umanineta, zago eri'za omerita, mago'ane zgoa (win moni) trohugahune huta hugahaze. ¹⁴Okima tamagrite'ma fore'ma haniazana ontahi'naze. Tamagra nanterampi hamponkna hu'nazankitma osi'a kna manitetma fanane hugahaze. ¹⁵Tamagra anage hugare, Anumzamofa avesi'ma me'nesigeta, tagrama tasimu erita manisuta, e'izana huge, amazana hugahune huta hugaragi, ¹⁶knare hu'none hutma tamufaga marenerize. Ana mika tamufga marerizana kefo avu'ava'za nehaze. ¹⁷E'ina hu'negu, iza'o fatgozama hu'zama antahineno, anazama osanimo'a kumi hugahie.

Feno vahe'mofa zmavumro naneke

5 ¹Menina kea antahiho, feno vahe'motma, tamasunku huta zavi'ateho, na'ankure tamazeri haviza hu'zana tamagrite ne-e.

²Tamagri feno zantamimo'a kasrigeno, hakanomo kukenatamia traga nehigeno, ³koline siliva zgotamimo'a krogro heno amnezankna hu'ne. Fenzana eri atru nehazankino, kegaga refkohu knazupa ana krogro he'zamo'a, tevegna huno tamavufga teno erihna hugahie. ⁴Antahiho, hozatamifi eri'za eneriza vahe'mofo, mizama ozami'naza mizamo'a ranke huno keaga huneramante. Hoza hamare vahe'mofo zavi krafagemo'a, hanavenentake Ramofo agesafi unefre. ⁵Ama mopafima manizana so'e nomanizampi nemanitma, mika tamavesi'zana eriknare nehaze. Tamagra knare neza nenetma tamazeri afovage nehutma, tamahema fri'nianknare neaze. ⁶Tamagri'ma ha'ma huoramante'za hazenkezmia omne vahera, huhaviza hunezamanteta zamahe nefrize.

Knazama akoheno manineno erizamofona naneke

⁷Nafuhetma, tamarimpa antefru hutma mani'netma, Ramo'ma esigura avega anteho. Hoza vahe'mokizmi zamageho, zamarimpa antefru hu'za mani'ne'za, hozazamifima e'se ko runtege, vgare ko runtenige'za hozazamifinti knare nezama hamarenaku avegama nentazankna hiho. ⁸Tamagranena akohetma mani'netma oti hanavetiho, na'ankure Ramo'ma esania knamo'a kofta hu'ne. ⁹Nafuhetane nasarahetanena, keaga refkohu trate otisageno refako huramantegahianki amu'nontamifina ha' orente arente osiho. Refako hu nera kafante otine! ¹⁰Nafuhetma, Anumzamofona Agifima nanekema hu'naza kasnampa vahe'mo'za, akohe'za mnine'za knazama eri'zamofona ko huraveri'naze. ¹¹Antahi'naze, knazampima ufre'za azeri agatere'naza vahera muse hiho hunezamantone. Jopu'ma knazampima kazigzi huno agatere'nea zamofona agenke'ane, henka'ama hunte'nea zamofona antahi'naze. Ramofompina asunku'zane, vahe'ma avesinteno asuraginte'zana avite'ne.

¹²Razana, nenafugatane nensarogata, monarero moparero mago'azantera huntetma huvempa osiho. Iza'o huvempa hunaku'ma hanimo'a, izoma hunakure hanimo'a, i'zo hino, i'o hunakuma hanimo'a, i'o hino, ana'ma osanimo'a henka keagare otigahie.

Tamentinti nehuta nunamu hanunazamofona naneke

¹³Amunontamifima magomo'ma hazenkefi mani'nenuno'a, Agra nunamu Anumzamofona hino. Amu'nontamifima mago'mo'ma musema nehanuno'a, agra Ramofo agi erisagahu zgame hugahie. ¹⁴Amunontamifina mago'mo'ma krime erinenuno'a, Agra mono kva vahe ke hanige'za, nunamu eme hunente'za Anumzamofona agifi masave frenteho. ¹⁵Hagi zamentinti nehu'za nunamu huntisageno, Ramo'a kri'ma eri'nea vahera azeri neganamreno azeri onetino, kumi'ma hunesiana, kumi'a atrentegahie. ¹⁶E'ina hu'negu kumitamia huama hutma kumira otrente atrente nehutma, nunamu ohunte ahunte nehinkeno, Ramo'a

tamazeri kanamareno, fatgo ne'mofo nunamumo'a hanavenentake hu'neankino eri'za erigahie. ¹⁷Ilaija'a tagri kna ne'mo, ko'ma orinogura hanavenentake huno nunamuna higeno, mopafina 3'a zagekafugi 6si'a ikampina kora oru'ne. ¹⁸Eteno Ilaija nunamu higeno monafinti komo'a tagirano mopafina korarigeno kavera fore hu'ne. (1 Kin 17-18)

¹⁹Nafuhetmane nasarahete, mago'tamimo tamage nanekea atreno hazamagrenesigeno, mago'mo azeri rukrehema hanigeno, ete tamage kantema esiana, ²⁰agra antahino, fri'zampinti agu'nevazino rama'a kumira refitegahie.